

~~C 8288~~

Ud 5360

Biblioteka Jagiellońska



stdr0007433

- 1
- 2, Epitaphia Cphi. Merzinii a Kurozwoki.
- 3, Dreover, Christoph. Radziwil.
- 4, Buzjins, Oratio funebris.
- 5, Tarobellus, Feralis pompa in funere A. Corvini.
- 6, Skemek, Andr. Lipe Lipski.
- 7, Tarobellus, idem q. no. 5.
- 8, Ch. de Chalez Chalucky.
- 9, Comenius, Sprinzel Gütten Obigkeit.

ORATIO
FUNEBRIS

IN ANNIVERSARIO
DEPOSITIONIS

ILLVSTRISSIMI IOANNIS
ZAMOSCII REGNI POLONIÆ
supremi Cancellarij, & exercitu-
um Ducis generalis. &c.

*Ab Adamo Bursio, Academia Samoscien.
Professore, habita Junij v.
A. D. 1606.*



SAMOSCI

4

Martinus Lenscius Typogr. Acad. excudebat.
Anno Domini M. DC. VI.

IN ARMA ILLVSTRISSIMI
MAGNI IOANNIS SAMOSCII
supremi Cancellarii regni Poloniae &
exercituum ducis generalis.



T Res hasta tria sunt insignia stemmata vite,
Doctrina insignis, virtus insignis, Et inde
Pro meritis veniens vultu fortuna benigno.
His armis aucti Samosciada usque triumphant
Aurato curru innecti Capitolia caeli,

ILLVSTRISSIMO
AC REVERENDISSIMO DO-
mino D. Georgio Samoyski Episcopo Chelmen-
si. Abbati Czeruenecen. Domino ac
Patrono obseruantissimo.

Adamus Bursius S. P. D.

S Ermonem hunc meum in lu-
cem exeuntem, ad te mitto,
tibi que dedico Illustrissime
Domine: multis nominibus
te prensantem. Primùm, quia loqui-
tur laudes Samoscii, hoc est, magni
patru tui: ideò, vt vniuersæ domus
illius, ita laudum quoq; , ad te impri-
mis pertinet patrociniū & tutela:
deinde, quia solus es summus præses,
A ij iudex,

iudex, & patronus huius Academię:
quantulumcunque id est, quòd ex il-
lius quasi sinu proficiscitur, id tibi
præcipuè debetur. Accipe igitur ex-
cellenti illo animo tuo hanc vocem
meam, minorem quidem longè quã
sunt laudes illius magni herois,

sed illi tamen debitam-

Vale.



ORA-

ORATIO.



SI QVIS EST VESTRUM, AVDI-
tores, qui forte, ab obitu Illustrissi-
mi herois Samoscii, miretur nostrū
vertentis huius anni silentium: is
obsecro consideret, quid intersit v-
num vulnus an plura accepisse: vno
dolore an pluribus esse confauciatum. Accepit ma-
gnum vulnus Respub. Polona, postquam sublatus
illi est magnus Cancellarius, magnus exercituum
imperator, Ioannes Zamosciius. Ille enim fuit arx
& murus regum & regnorum Poloniae, princeps
ac culmen Senatus, custos legum, defensor liberta-
tum, lumen ac decus civium, commune perfugiū
bonorum, fulmen bellorum, terror hostium, deli-
ciæ literarum ac literatorum. Ad quem commu-
nem & publicum luctum, accessit priuatim orbi-
tas nostra: quæ cōiuncta cum malo cōmuni, gemitu
nato dolore simul & ingenium & vocem nobis in-
terclusit. Nunc quoque, si fas esset, quibuscunque
ausibus nostris ipsum ad vitam reuocari posse, tanti
esset non modo lugere, sed etiam de vitæ nostræ
demenso vitam illius redimere. Sed quia ille neces-

A iij

sitati

fitati naturæ concessit, & cœlitus ex hac statione in aliã est vocatus, cum prima forte vti non possumus, vtamur secunda; memoria virtutum, præsentem illum nobis faciamus: ab hac parte mori ille non potuit, quem rerum gestarum gloria iam pridem immortalem reddiderat. dum vixit, ærarium omnium bonorum omnibus præstitit: quod reliquit, specilegium est, sed rarissimum & preciosissimum, ciuibus suis insigne exemplum virtutum. Iam enim minus requiretis peregrina: hîc hîc domi habebitis omnis exempli documenta, in illustri posita monumento: vnde vobis Reiquepub. quod imitemini, capiatis. Quod multi excudent elegantius, vt est & materiæ & ingenij benignitas. mihi non tam copia quàm modus in dicendo videtur esse quærendus. Quamobrem præteribo, quæ illi cum plerisque multis fuere communia: quòd natus fuerit paterna stirpe & materna, auis, atavis, maioribus clarissimis & fortissimis viris. Plena est historia, plenæ voces Polonæ nobilitatis. A quo enim rerum Polonicarum scriptore, non celebratũ genus paternum Zamosciorum? qui iam inde ab vltima memoria, non aduenæ in hæc regna, sed indigenæ huius regni, ex stemmate nobilissimo Kozloro-

zlorogorum nomine dicebantur. Ex quibus Florianus, cognomento Sari, vetustissimũ insigne gentis suæ, nouo monumento virtutis, auxit & cumulauit. Nam Prussico bello, rege Wladislao Lokietko, cum inter hostiũ cæsa cadauera, fortissimè pro patria pugnans, effusis visceribus iaceret, à rege id spectante & admirante, ad memoriam sempiternã & decus immortale nominis Samosciani, ad trium hastarum vetus insigne, Kozlorogi dictũ, nomen Ielitorum stemmatis, quod est Samosciorũ, est cõsecutus. Ex hoc genere paterno oriundus, maternũ duxit ex antiquissima & nobilissima gente Herburtorum: qui cum multis tam belli quàm pacis artibus perpetuo successu Rempub. hanc auxerunt & ornârũt, tum imprimis ingenij & doctrine gloria illustrârunt. Verũm hæc, vt dixi, Zamoscius cũ plerisque multis habuit cõmunia: patris illius certè singularem prudentiam mirari par est. Is fuit Stanislaus Zamoycki, vir per multa militiæ decoratus: quorum commendatione, primum nobilissimo municipio in Russia Belz nominato præfectus, postea in amplissimum Senatus ordinem est cooptatus, Castellanusque Chelmenis appellatus. Multa huic viro debet cum Russia, parens & altrix
ipsum

ipſius, regio clariffimorum & fortiffimorum viro-
rum fertiliffima; tum vniuerſa Polonia: non ſolū
ideo, quòd hoc decus & lumen nominis Poloni Io-
annem procreauit: id enim fortunæ eſt: ſed quòd
procreatum ita educauit & inſtituit, vt primus iter
oſtenderit & patefecerit, quò eundem ſit huic, qui
bonus & commodus patrię ciuis ſit futurus: quod
ſingularis eſt prudentiæ. Quamprimum enim atti-
git hanc ætatem, in qua pueriles animi primis lite-
rarum incunabulis informari ſolent, miſit eum di-
ſcendi cauſſa Craſnoſtauum, oppidum quondam
celebre, ſed maximè eo nomine; quòd illud homi-
nem eruditum Albertum Oſtrowski, tunc ludi lite-
rarij præfectū haberet: quo primæ literaturæ pue-
rilis præceptore uſus, cū celeriter æquales inge-
nij gloria ſuperaffet, facilè diſciplinæ illius riuulis
exhauſtis, ad fontes ipſos ingeniorum ſe contulit.
Erat Gallia tum plena doctiffimorum virorum, in
quibus illa lumina fuerunt: Adrianus Turnebus,
Dionyſius Lambinus, Iacobus Carpentarius, Pe-
trus à Penna. qui & quanti Deum immortalē vi-
ri? quàm docti, quàm celebres? Turnebum igitur
& Lambinum principes ac duces ſibi elegit in his
ſtudijs, quibus animus ad humanitatem informari
debet:

debet: Carpentariū in artibus & Philoſophia: Pe-
trum à Penna in Mathematicis ſcientijs præcepto-
rem ſumſit. Sed quid ego hæc commemoro? num
pauci, noſtratum quoq; , illorum præceptorum i-
bidem copiam habuerunt? ex quibus tamen nemi-
nē Turnebi aut Lambini, aut Carpentarij, aut Pe-
tri à Penna, diſcipulum agnoſceres, Ioannem Za-
moſcium facilè agnoſceres. Ecquid hoc rei eſt?
Studium, auditores, ſtudium, & arctiffima optimi
temporis in optima ætate parſimonia. Id id inter-
eſt. Quantum enim alij ab audiendo temporis da-
bant conuiuijs, quantum alex, quantū pilæ, quan-
tum luſibus, voluptatibusque alijs, tantum ille ſu-
mebat ad recolenda hæc ſtudia, quæ ex præcepto-
ribus audiebat: nec ſolū tunc, quum audiebat;
ſed quem guſtum ab illa uſque ætate imbuerat, e-
ius ſapor, vt ita dicam, ad vltimum uſq; vitæ ſpi-
ritum in eo perdurauit: veriffimeq; de illo dictita-
batur, quod de ſapientiffimo ſimul ac inuictiffimo
imperatore Romano Scipione Africano dictitari
ſolitum traditur: nunquā minūſ ſolum fuiſſe, quā
cū eſſet ſolus: nec minūſ ocioſum, quam cū eſ-
ſet ocioſus. Siue enim domi, ſiue foris, deambulā-
do, iter faciendo, in caſtris, inter arma, ac tela, per-
dius

dius, ac pernox, quantum ocij concedebatur vel ab
requite corporis, vel à negotijs Reipub. totum ad
recolenda literarum studia conferebat : & hunc
reditum ad literas iucundissimā sibi esse animi re-
quiem prædicabat. Adeò à teneris asuescere mul-
tum est. Verū vt ad id, quod cœpi, reuertar. His o-
ptimarum disciplinarū velut mercimonijs ex Gal-
lia deportatis, infatiabili quadam discendi cupidi-
tate inflammatus, Patauium venit : in vrbem cele-
brem, atque eruditissimis hominibus, studijsque af-
fluentem. Ex hac plerosq; nobilitatis Polonæ nu-
per vidimus adferre solitos doctrinam, subtilem il-
lam quidē, & acutam, sed abhorrentem ab vsu hu-
ius Reipub. ex qua nihil neque ad communem af-
ferre fructum, neq; in aspectum Reipub. lucemq;
proferre poterant. Samoscius autem, cū sibi per-
suasisset, nihil esse in vita tantopere expetendum,
quā laudem diuini numinis, & patriæ felicitatē :
vt ea copijs locuples, opibus firma, gloria ampla,
virtute honesta sit : ad iurisprudentiam animū ap-
pulit; quæ regendis populis, administrādæ Reipub.
maximè vna scientia est comparata: eam igitur ve-
luti vltimam manum studio imposuit. Interea cū
de ingenio eius, & singulari eruditione in dies fa-
ma cre-

ma crebresceret, omnes, quicūque de ingenijs ali-
quid iudicare poterant, certatim sese illi applicue-
runt : ac vnanimi consensu principem iuuentutis
literatæ, Rectoremque Academiae Patauinæ crea-
uerunt. Quo munere cum ingenti laude decurso,
quū iam abundans præceptis, institutisque opti-
marum artium, maturus videretur rebus gerendis,
patriæ amor in Poloniam illum reuocauit. Nunc
demum is mihi campus esset orationi: si modo pos-
sem pro magnitudine hominis, magnitudinem o-
rationis afferre: sed quum parem non potero, pro
re nata, quam potero, postquam cæpi, prosequar.
Tria ego existimo esse in ciue principe, quæ qui ha-
beat, nō ego illum quidem, vt noster ille, Deo simil-
limum iudico, sed cū illo comparo, quo post ho-
mines natos nec maior vir, nec nobilior, aut clari-
or ciuis esse potuit. Ea sunt: doctrina, virtus, feli-
citas: quæ omnia in multis alijs mediocria vel legi-
mus, vel accepimus; in Samoscio omnia summa
vidimus. Conscij sunt doctrinæ, & eruditionis il-
lius, quicūque ad eum, vel cum eo vnquam ser-
monem habuere. Quandocūque & quotienscū-
que ad eum verba fiebant latina, illa, quæ ex tem-
pore respondebat latinè, latiniora & cultiora e-
rant,

erant, quàm ea, quæ ab alijs, qui non mediocre nomen ex literis habebant, meditata, ac parata afferebantur. Quæ verò cogitatè accurate quæ scribebat; ea sic probabantur, vt ad veterum scriptorum laudem peruenirent. Documento sunt scripta eius, cū magno emolumento rei literariæ in lucem edita. De Senatu Romano liber: quo admodum adolescens eruditissimam criticorum gentem conturbauit. Quid enim illis accidere potuit magis inopinabile, quàm iuuenem in vltimis Septemtrionibus natum, quos illi barbaros vocitāt, id opus conscripsisse, quod senes, in omnium literarum luce natos, necesse fuit admirari. Sed virtus nec ætatē expectat, nec locum moratur. Dedit igitur specimen, qualia & quanta sint ingenia nostrorum, si ritè e ducta exculta quæ fuerint. Extat illius etiam opus legum & institutorum Academiae Patauinæ, quod antè dispersum & corruptum collegit, ordinauit, recensuit, edidit. Argumentum ingens, quantus erat futurus patriarum legum peritus, qui peregrinarum tantoperè fuit studiosus. Extat elegantissima oratio illius edita, qua vsus fuit ad Henricum Valesium, quando legatus à Repub. Polona missus, ipsum ad imperium in Poloniae regnum vocabat.

bat. Artium verò Philosophiæque cognitio planè in eo fuit admirabilis. Quicquid enim à Græcis vel à Latinis ingenijs egregium, & doctrina scientia quæ dignum literarum monumentis proditum est, nihil est, quod ille non viderit, legerit, planèque perceperit, sed etiā tenacissimè meminert. In quo tantus fuit, vt sæpenumero nos ipsos in ruborem daret: qui assiduè in libris habitantes, nocturna atque diurna manu, scripta doctorum versabamur: neque tamen ex ijs ita facilè, quoties vsus venit, prompta parata nobis sub manum veniebant, quàm illi, qui ante multos annos hæc ipsa cognouerat. O diuiniorem quàm Themistocleam memoriam auditores. Itaque cū iam totum Respub. haberet, quæque summa erant, tam bello, quàm pace gereret, vnicā tamen & referebat, & ostendebat, in fluctu negotiorum, animi recreationē, quàm in Academia, quam in patrio solo condidit, ventitare: nobilemque iuuentutem non solum præsentia excitare, sed etiam voce hortari; nec voce solum, sed disputando experiri: cum Philosophis, de Philosophia, philosophicè: cum Mathematicis, de mathesi, mathematicè: cum Iurisconsultis, de Iurisprudencia, consultissimè. Idque vnico hoc nomine se factitare & dictitabat.

tabat, & declarabat, vt iuuetus Polona intelligeret, ex quo fonte illa, quæ summa omnia in ipso erant, hauriret: hincq; persuasum suo exemplo haberet, nunquam nec se potuisse, nec quenquã posse principem in Repub. extare ciuem, ad cuius naturam eximiam atque illustrem, ratio ac conformatio doctrinæ non accesserit. Quæ cum maxima in illo esset: ab ea tanquam à fonte manabant, quæcunq; siue pace, siue bello, pro salute huius imperij, pro vita ciuium, proque vniuersa Repub. ab eo gesta fuerunt. Quod ipse sæpenumero prædicabat, se quicumque, & quantuscunq; esset, omnia optimarũ artium studiis accepta referre. Eorum enim decursis spatiis, ex ingenij doctrinæque celebritate cognitum ac commendatum, Sigismundus Augustus, Poloniæ Rex, in collegium Secretariorum suorum cooptauit: atque protinus inter primos huius ordinis habuit, moxque, quod regis sapientissimi erat iudicium, Samoscij uerò summa in suscipiendo dexteritas, in agendo sedulitas, in conficiendo felicitas, non solum regio tabulario, quod Archiuum dicitur, ipsum præfecit, sed breui Capitaneatu Belzensi ornauit. Nec post vnquam vel regem impositi, vel Samosciũ suscepti muneris. pœnituit.

nituit. Sicut attentus ad rem patēfamilias, nactus fertilem illum quidem natura, sed propter aratorum pigritiam, nec cultum, nec fructuosum; intellecta soli bonitate, impensè operam faciendo, incredibile quantum horreum frumenti congregauit. Ita Samoscius, quæcunq; antea in actis publicis, pulcherrima illa quidem, & maximi momenti, sed veluti moles quædam indigesta, per incuriam, suppellex iacuit, illam recensuit, disposuit, ordinauit. Qui labor illius non solum Reipub. bono fuit, sed ipsi priuatim etiam in magnum emolumentũ cessit. Quod enim discrimen esse putatis inter eos, quos Respub. in amplissimo dignitatis gradu collocauit: ex quo tamen cum de Repub. consilia ineunda, sententiæque dicendæ sunt, alii musant, alii pedibus in aliorum sententiam eunt, alii ita loquuntur, vt nec caput, nec pes, vt est in pro- uerbio, eorum orationis appareat. Samoscius autem, omnibus Reipub. temporibus, iure suo potuit dicere idem, quod Apollinem apud Ennium dicit asse tradit Orator ille, se esse eũ, vnde sibi populi, & reges, & omnes ciues consilium expetunt.

*Suarum rerum incerti, quos mea ope, inquit, ex
Incertis certos, compotesque consilii
Dimitto, vt ne res temerè tractent turbidas.*

Verissimum enim oraculum fuit ciuitatis Polonę: ad quod ora sua populus Polonus conuertebat, ex cuius ore pendeat, à quo compos consilii, & rerū suarum, in quascunq; ille incubuit, certus redibat: ex cuius ore melle dulciorem audiebat orationem. Hoc discrimē est hoc auditores: quòd Samoscius, ad summam scientiam rerum vniuersi sæculi, ad cognitos & perspectos omnium gentium, nationum, populorum, ex monumentis literarum, mores, leges, instituta, consuetudines, ad id, quod intelligentia penetrauit, & notitia complexus est, omnium omnis æui Rerumpub. ortus, incrementa, motus, conuersiones, occasus, earumque prægressus, & antecessiones, causasque omnes in memoria habuit: ad hoc inquam adiunxit accuratam & exquisitam rerum domesticarum cognitionem: sine qua nemo, qui, & vbi sit, potest agnoscere: sed semper tanquam hospes & peregrinus in sua ciuitate versabitur. Samoscius autem verissimè viuā bibliothecā fuisse, possis affirmare. Ille ætates patrię, ille iura publica imperii, ille priuata ciuium, ille domesticam, ille bellicam disciplinam, ille fœdera cum vicinis populis, pacta conuenta cum sociis sciebat: omnium denique humanarum diuinarum-

narumque rerum notitiam habebat. Felicissimè igitur per eum Respub. omnia & loquebatur, & agebat: nihil ei nouum, nihil inopinum, nihil difficile, nihil arduum erat: omnia animo præcepta, præmeditata, pertractata gerebat: ad omnia Reipub. tempora, casus, pericula propè sub manu & consilia, & remedia inueniebat. Verum non solum præsentia bona, vel mala, sed quod multò diuinius est, futura, tanquam ab altissima specula, ab excelsa animi sapientia videbat luculentissimè, denuntiabat certissimè; nunquam perplexus, nunquam obliquus, nunquam falsus. Hoc est, hoc, auditores, demum sapientem esse, non modò, quæ ante pedes sunt, videre, sed longè in futurum prospicere, vt dixit ille. Hūc talem, ac tantum, magnus ille animo, sapientia, virtute, Stephanus Battoreus Rex Polonię, postquam ad imperium venit, diligenter quęsiuit; morum, consuetudinū, legum, iurium, totiusq; Reipub. gnarum: sine quarum rerū scientia Rempub. dextrè gerere videbat se non posse. Maiorē inuenit Samoscius, quàm quærebat: non solū in pacis artibus consultissimū, sed in bellis fortissimū, felicissimum, vt vidit eum, vt cognouit, omnibus dignatus est, quibuscunq; maximus potuit, quæ sum-

mæ illi virtuti debebantur. Fecit cum imprimis legum omnium tam publicarum, quam priuatarum huius imperii custodem. (is enim legibus, & moribus Poloniæ est supremus Cancellarius) Magnum mehercule munus, tantique momenti, quanti sunt ipse leges: salus nimirum, ac anima ciuitatis, verum nulli, quam Samoscio conuenientius, qui ipse anima, vt sic dicam, fuit legum, ac iuris. Putabatur pluri nostrorum imperiti rerum quidem, sed prompti manu, & ferro viri, longissimis spatiis à se distata esse ista, Mineruam & Martem, literas & bella, libros & tela, nec in vnū concludi posse. Verum laudatissimè sapiētissimus Rex iudicio suo illorū stultitiā condemnauit: Samoscio virtute refutauit: Regis iudicium mirificè comprobauit. Creatus enim à Rege Imperator exercituū, Deum immortalem, quæ, & quanta documenta dedit: non frustra ab antiquissimis, iisdemque sapientissimis; Palladem armatam statui solitam. Tantus Imperator in omni genere belli fuit; præliis, oppugnationibus, totiusque belli instrumentis, & apparatu: vt neminem ducem post exortam Poloniam parem, neminem eorum, quos vsquam legimus, maiorem extitisse vnquam ostendere habeamus. Quatuor censet ille

has res

has res in summo Imperatore inesse oportere: scientiam rei militaris, virtutem, auctoritatem, felicitatem. Quæ res ex his, obsecro, illi defuit, aut potius quæ non summa in illo fuit? scientia cernitur in exercitu ducendo, in castris metandis, in locis capiendis, in vrbibus, ac arcibus obsidendis, expugnandis, capiendis: in arte conciliandorum hominum. Quis illo in his omnibus fuit scientior? qui omnibus bellis, quæ à regibus Poloniæ hac tempestate, qua vixit, gesta sunt, non interfuit solum, sed etiam præfuit. Qui Imperator plura bella gessit, quam alii legerunt: plures vrbes cepit, quam alii viderunt: plures victorias rettulit, quam alii concupiuerunt: plures triumphos egit, quam alii spectauerunt: & quod diuinum est quiddam, sine vlla vnquam offensione, nulla suorum iactura. Nec sine causa. Nihil enim vnquam egit, nihil est molitus, quod non prius consultum, cognitum, exploratum haberet: opportunitates, loca, tempora, accessus, recessus sciebat. Nemo castra metari elegantius, nemo loca capere opportunius, nemo præsidia collocare tutius, nemo acies instruere melius ipso potuit. Nunquam igitur victus, semper victor: nunquam offensor; semper triumphator extitit. In

C ij

oppu-

oppugnationibus verò, vbi fossæ ducendæ, vt tanto interuallo, tanta vi vnumquodque bellicū tormentum muros ferire, penetrare, diruere possit, Archimedeæ arte circuli, trianguli, aut quadrati vsu, tum aliis instrumentis conficiebat: Hinc fiebat, nullam tam munitam esse potuisse urbem, aut arcem, quæ virtuti illius esset inexpugnabilis: vt ad quamque venit, vidit, fregit, vicit, cepit. Virtutem autem illius, quis satis aut demirari, aut verbis consequi possit? Laborem in negotiis, fortitudinem in periculis, industriam in agendo, constantiam in perficiendo, longè maiorem, quàm in Pompeio. Laudatur Alexander Macedonū Rex, & maximus omnium Imperatorum iudicatur: & iudicatur nō à Phormione aliquo, qui nunquā ipse castra, nunquam hostem uiderit, sed ab Annibale summo ipso Imperatore, qui in castris natus, in castris educatus, cum Romano populo totius orbis terrarū victore, multos annos de imperio dimicauit: laudatur, inquam, ex eo, quòd parua manu innumerabiles exercitus fudisset, quòdque vltimas oras, quas visere supra spem humanā esset, peragrasset. Sed si Annibal reuiuiscere, & bella ab Alexandro gesta cum ijs, quæ à Polonis duce Samoscio gesta sunt, quasi

ad tru-

ad trutinam examinare posset, sententiam mutauisset: & palmam ab Alexādro ad Samosciū transfulisset. Quid enim? tantus Imperator non facile sensisset, quid interesset cum Dario homine eneruato deliciis, fracto voluptatibus, exarmato ignauia, & cum Ioanne Basilide viro multis domi, ac militiæ rebus clarissimo bellum gerere. Huius potentissimi Europæ, Asiæq; Regis Stephanus Batto-reus Poloniæ Rex, duce Samoscio, innumerabiles copias parua manu fregit, vicit, ad accipiendas à Polono populo leges compulit, Liuoniam ab eo recuperauit. Sed vbi locorum? Deum immortalē: ad septentrionis vsq; oras vltimas, loca sylvarum solitudinibus inuia, cœli crudelitate inhospita, dira niue, ac gelu horrida. Vbi ei non solum cum bellicosissimis hominibus illi cœlo familiarissimis, sed cum ipsa locorum natura vsu venit pugnandum. Verum in isto bello, quanquam ductu Ioannis Samoscii non modò affecto, sed etiam confecto; quia tamen diui Stephani Regis non modò auspiciis, sed etiam auxiliis gesto, cui ille heros fortissimus, non solum præfuit, sed etiam interfuit, nō nihil potest magnitudo talis, ac tanti Regis de laudibus Samoscii delibare. Si ista laudum delibatio potest ap-

C iij

pellari,

pellari, ac non potiùs summa laudū accessio, quòd sapiētissimus simul, ac fortissimus Rex vidit, & iudicauit, à se tale ac tantum bellum confici non potuisse, nisi tali, ac tãto viro vsus in eo gerendo fuisset. Sed ad ea veniamus, quæ proprio Marte ab eo, etiam sine Theseo, vt est in prouerbio, ipsum summum fuisse Imperatorem mirificè comprobârunt. Mortuo enim Diuo Rege Stephano, & Reipub. ad interregnum lapsis temporibus, hic solus fuit, qui, vt coelum Atlas humeris portare traditur, sic ille res Polonas sustinebat. In maximo comitiatu ad Warschauiam, cùm pro legibus contra libidinem, pro libertate contra seruitutem, pro iure contra vim, pro imperio contra factionem fortissimè stetit: effecit, vt maior, & melior pars ciuium, liberè, atque ordine, posset, quæ sentiret de summa Reipub. statuere. Omnibus igitur imperii Poloni ordinibus suffragantibus, legibus, & more maiorum, designatus est Rex Polonię is Sigismundus tertius. Sed cùm aduersa factio contra ius, & fas, Maximilianum Archiducem Austrię designasset, datum est à Reipub. Ioanni Samoscio negotiū, videret, ne quid detrimenti Respub. eaperet. Is, vt fuit legum custos, vigilantissimus, libertatis defensor acerri-

mus,

mus, Cracouiam proficiscitur, sedem ac domicili-um imperii Poloni designato Regi Sigismūdo, seruaturus. Quid multis opus est? ad arma cum Maximiliano ventum est. Maximiliani copias, Cracouiam oppugnatione infestantes, ad ipsa vrbis moenia fundit: ipsum Maximilianum. nouo, ac validò exercitu auctum, ad Bicinum consequitur: signis collatis vincit, capit, in triūpho Regi suo sistit. Quę ynquam fuit victoria illustrior? pro quibus illius cùm de patria, tùm de Rege suo meritis, Deus Opt. Max. tãta eum auctoritate munuit, vt nemo postea hostis, non modò arma illius, sed nec vultū quidem potuit sustinere. Scytarum gens barbarie immanissima, multitudine innumerabilis, bellicosissimo suo Imperatore Cassigero, fines imperii Poloni transire tentauit, quam aduersus, rapta valde exigua manu suorum Samoscus, ad Cicoram castra est metatus. Inter maximos imperatores ponitur Pyrrhus, quòd castra metari scierit, quis scientiùs illo tempore castra metari potuit? Vt iis solis hostem in armis exercitati ssimum, in præliis fortissimum, ac potentissimum, conturbauerit, terruerit, perculerit: effecit hoc Samoscus. Si in eorundem summorum imperatorum numero statuitur

magnus

magnus Alexander, quòd pauca manu magnas hostium copias fundebat, quis minore manu maiores copias vnquam profligauit? octuaginta millia Scytarum in armis fuere: quos Samoscius tribus Poloni militis millibus infestando, iaculando, cædendo, ita afflixit, vt pacem petere, arma ponere, leges accipere, victore Samoscio necesse haberent. Quod si quispiam est, qui hoc sibi vindicauerit, in aliis certè potuerit, quibus vinci & seruire non est nouum, in Scytis non potuerit, quæ sola gens ex paucis nūquam fuit perdomita. Verum abhinc protinus vix respirare, & paci morem ponere datum est, ecce Daciæ vltioris tyrannus Michaël, omni copiarum genere abundans, Daciam citeriorem, populi Poloni prouinciam aggreditur. Quid dicam, spiritibusne hostium populi Poloni, an insolentia affluentis perpetuò fortunæ inflatus, aut potius infatuatus, tam audax facinus aggressus fuerit? Sed credibile est magnitudine copiarum, quas numerosissimas, ex bellicosissimarum gentium populis, trahebat; fretus magnitudine victoriarum ex potentissimo Asiæ tyranno Turca toties deportatarum elatus, in hanc mentem est impulsus. Felicissimus futurus, si ex alio mustaceo, vt est in pouerbio, laureolam petere voluisset. Quid

enim eo esset felicius, si importunissimum Christiani nominis hostem Turcā coercere, distrahere, infestare, exterminare perseuerasset? certè immortalem suo nomini gloriam comparasset. Verum nescio quæ mala mens ipsum impulit, vt potius segetem ac materiā gloriæ suæ relinquere: quam dedecoris & ignominie labem quærere maluerit. Quid enim aliud quæsiuit? Trahebat secum Moldatiam, Seruiam, Transiluaniam: sed paucis velitationibus vim ac robur nostrorum expertus, quamuis paucorum, ducis vero nomine consternatus, loco motus est, receptui intra cauernas montium & sylvarum cecinit. Ad Thelesinum loco munitissimo capto, exercitu instructo, prælii copiam fecit: sed signis collatis, mox acies eius inclinata, ferre virtutem nostrorum non potuit: hostes fusi, fugati, multa millia cæsa, ipse Michael per iuga montium cum paucis in Vngariam fugit. O singularem imperatoris nostri virtutem auditores: Scandeburgus in eo renatus dicebatur: Turcarum, Vngarorum, Germanorum, plures ac validos exercitus toties fuderat: is qui primò aduentum Samoscii ferre non potuit, vim sustinere quomodo poterat? Hic iam fortuna populi Poloni desiderabatur, vt perdomitis longè lateq; hostibus, pacata quiesceret: nisi perfidia

Caroli, Sudermaniæ ducis, non satis sibi putasset Sueciæ Regnū interuere, nisi idem perfidiæ virus in Liuoniam transferret: transtulit & infecit adeo, vt traiecto exercitu, totam ferè Liuoniam occuparit. Venit igitur in potestatem Caroli Liuonia, prouincia populi Poloni, non ita pridem, eodem duce Samoscio, ex potentissimo hoste, Moschouie duce, recuperata. Quid miremur prius, sceleratissimamne perfidiam Sudermani: qui patruus, aduersus filium ex fratre, sceleratū ac nefarium bellum suscepit: an furorem Suecorum, qui illum sunt sequuti: an potius pietatem incredibilem Ioannis Samoscii, qui oblitus ætatis suæ senilis, oblitus fractæ iam infinitis laboribus valetudinis, oblitus quàm longissimum iter iret, quàm omni miseriarum genere infestissimum, ibi se totum tulit, vbi hostile incēdium, patriæ damnum, Poloni nominis labem conspexit. Quod tamen sæuissimum bellum modò non tertio pedatu, vt dicitur, conficisset: si illi tantum cum hostibus, quamuis perfidis; quamuis temerariis esset pugnandum. Sed pugnatum est atrocius, cum fame, siti, morbis, algu, & gelu sæuissimo: atrocius cum exercitu optimè merito, non optimè habito. Prouincia à Carolo

ad in-

ad internecionem deuastata, hinc fames: stipendia & supplementa exercitui frequentius retēta quam data: hinc discessionēs. Videres, ô dolor: ô pudor; imperatorem fortissimum Poloni exercitus, cum lachrymis precabundum milites pressantem, manerent, perferrent, obdurarent: infectis rebus non abirent: videres ipsum in oppugnationibus, inter media tela tormentorum volitantem: ictu globi truncatā frameam vibrantem: sub muros fortissimè tamen nitentem: in castris, sub pellibus integregarios milites vilissimo cibo, sordidissimo foculo, senile corpus sustentantem: simul & imperatoris & militis munia obeuntem: ærarium quantū potuit præstantem: interim tamen prouinciā conficiebat, hostes submouebat, arces ac vrbes munitissimas recipiebat, vbiq̄ue victor redibat. Verumtamen huius belli sæuitia confecit eum: hoc ille vltimum testimonium pietatis suæ in patriam reddidit, cum infracta quidem valetudine, sed victor tamē domum reuersus obiit. Ach lugubre Volmarum, Felinum, Białokamienum, nō es tanti nec tota Liuonia. Sed Samoscio tanti erat mortem obire, dummodo ciues à perfidia & violentia hæretica, patriam & Regem à dedecore & damno libera-

D ij

ret.

ret. Quid interest inter, non dico, Codrum & Decios, qui se pro populorum suorum salute morti deuouerunt: sed inter eos, qui veræ religioni, contra falsam, sanguine fuso testimonium reddiderunt: unde & martyrum nomen inuenerunt. Breuiter, non pro rerum magnitudine, sed pro temporis necessitate, bellica eius facinora memorauit: quæ illū summum fuisse imperatorem declarant. Sed quoniam bellicas laudes solent quidam extenuare verbis, easque detrahere ducibus, communicare cum militibus, ne propriæ sint imperatorum: ad eas venio, quæ socium habent neminem: ex quibus nihil centurio, nihil præfectus, nihil cohors, nihil turma decerpit: quæ sunt maxime: prudentia summa in gerenda Reipub. cuius illa sunt duo maxima capita: vnum, quod semper ille totum corpus Reipub. curabat: alterum, quod sic tuebatur vtilitatem ciuium, vt quicquid ageret, ad eam referret: oblitus commodorum suorum. Solent alii vni parti Reipub. consulere, alteram deserere, aut negligere: solent regibus assentari, ciuium libertatem & commoda negligere: quinetiam aliqui perdere. Si rem perniciosissimam in Reipub. inducunt, seditionem atque discordiam: ex quo euenit, vt alii populares,

alii

alii regum studiosi sint & esse dicantur. Samoscius, & omnium regum Poloniae, cum quibus vixit, maiestatem semper sacrosanctè non solum amauit, coluit, obseruauit: sed etiam tuebatur: & Reipub. ac ciuium commoda atque libertatem acerrimè defendebat. Sapientissimè moderabatur hanc nauim, veluti inter Scyllam & Charibdim: ne qua pars Reipub. offenderet: ne quid detrimenti acciperet: vt tota integra, facta tecta que duraret: vt ad portum boni publici nauigaret: ita libertatem patriæ ac ciuium tuebatur, vt regiam maiestatem sacrosanctam haberet: ita rursus reges colebat, vt iura, leges, incolumitatemque Reipub. sanctissimè custodiret. Non vnus, sed vniuersorum studiosus erat: omnibus consultum volebat: seditiones ac discordias odio habebat; quod verum ac rectum erat, semper & prudenter sentiebat, & liberè dicebat. Testantur hoc illius pro regum suorum incolumitate & maiestate, cum ciuibus dimicationes: testantur rursus ad reges fusæ, nonnunquam cum lachrymis, cohortationes, preces, obtestationes pro Reipub. vt eam ament, defendant, tueantur, oblitum commodorum suorum: sed etiã in extrema vitæ tegula quum staret, id quod antiquissimum per omnem vitam

D iij

habuit,

habuit, moriturus, more solenni confessus est, & supremis verbis protestatus, & tabulis mandavit testamenti. Verba eius audite. *Secundum Deum, inquit, maximè in terris, Serenissimos reges meos, & Rempub. non assentatorum more, sed sincere colui: quibus fidem integram inuiolatamque seruaui: & eorum dignitatem foris, & libertatem charissimam domi semper habui. Qua in re certè nulla ex parte laesam conscientiam me habere, subiturus etiam Dei iudiciũ profiteor. Ciuibus meis quibusq;, qui me laeserunt ignosco, & ab iisdem mihi ignosci, expeto. Pietatem erga patriam, obseruatiamque erga regem, commendo: ut luxum et discordiam fugiat quàm maximè, et feneratorũ auaritiam, publico consensu, coerceant; rogo. Pro me nihil aliud quàm memoriam qualiumcunque meritorum meorum, postulo. Confido S. R. Maiestatẽ patriam hanc nostram, quæ illum excepit, & alius prætulit, ac suorum sanguine in regno confirmavit, constanter redamare: amor autem meus facit, ut eum vel currentem etiam hortari debeam. Priuatim verò ab Maiestate Regia animum erga unicum filium ac domum meam, peto; cuius cura, benignitati, & auctoritati, præcipuè eundem filium meum commendo, & quasi de manu trado, in sinuq; eius depono.*

Si quis

Si quis est, qui sentiat, aut dicat serenissimo meridie non lucere, idem dicet (sentire enim nihil potest) Samoscii merita esse obscura, monita autem & preces eius, ac vota nõ sanctissima. Vtinã verò eorum, utinam ò Samosci compos fias: non dubiũ est, quin felix ac beata Respub. sit futura. Quam etiam tum singulariter beavit, quum iudicia à regibus ad populum transtulit. Ille enim transtulit, qui auctor, inceptor, perfector, sapientissimo ac fortissimo Regi Stephano Battoreo fuit, ut trãslata vellet. Nam quum infesta vario genere bellorum Reipub. tempora essent: ille autem rex bellicosissimus nisi præsens vbiq;, defendendis finibus imperij adesset; pati non posset: iudicia, vel propter multitudinem actionum, vel propter fori, interdum usque ad vltimos fines, in plures annos quandoque remotionem: non modò cum magna difficultate, & temporum spaciis, sed etiam cum magno sumptu peragebantur. Vidit hoc Samoscius, & indoluit: protinusque Regi auctor fuit: ut potius malet de maiestate & auctoritate sua regia detrahere, quàm de commodis ciuium. Hoc est, hoc Senatorem esse. Non magis igitur Stephani Regis, quàm Ioannis Samoscii beneficio, habetis iudiciorum tribunalia,

bunalia, ex equestri vestro ordine, instituta. Neq;
verò in publico solū, hāc diuinam animi æquitatē
habebat, sed etiam priuatim. Nunquam ille nisi ad-
uersus iudicatum hostem patriæ ferrum strinxit,
nihil citiùs quàm priuatas iniurias obliuisci solitus,
quas obliuisci nefas putabat, non armis, quamuis
poterat, (vt solent nūc plerique) sed iure perseque-
batur ac disceptabat. Vi neminem ynquam pressit:
ab omnibus intestinīs contentiōibus alienissimus
erat: de inimicis, aut tacebat, aut honorificè loque-
batur: à conuiciis & maledictis abhorrebat. Quæ
omnia ab excelso illius animo proficiscebantur.
Hanc singularem illius animi magnitudinem, com-
mitabantur illæ principes virtutes: magnificentia
in agendo, munificētia in dando, constantia in perfi-
ciendo, Deum immortalem, quid ille in vita egit,
nisi magnum? non solū ornamento, sed etiam
munimento regnis & imperiis sunt vrbes. Contē-
plamini Samosciū, Sarogrodum, Iwangrodum,
& alia oppida. Samosciū certè abhinc triginta an-
nis conditum, cum qua vrbe Poloniæ, siue elegan-
tialocorum, siue frequentia hominū, siue pulchri-
tudine ædificiorum possit comparari? murorum
certè, qui circumducti sunt, & propugnaculorum
insupe-

insuperabili munimento, cum nulla potest com-
parari. Urbibus non solū ornamento, sed etiam
honestamento sunt templa, munimento etiam ar-
ces; quid templo Samosciano magnificentius? si-
ue materiæ, siue figuræ, ac formæ elegantia? quid
arce elegantius? Verūm & Vrbes, & templa, & ar-
ces horrent, & squallēt, nisi sint homines culti, mo-
rati, sapientes. Huius rei gratia sapientissimus Sa-
moscius instituit in eadem vrbe sua Academiam,
cultissimum seminarium omnium bonorum, arti-
um optimarum, scientiarum, virtutum: seminari-
um Ecclesiæ Dei sacerdotum: seminarium Reipub.
bonorum ciuium: seminarium omnis generis ho-
minum, omni ordini, conditionique huius imperii
utilium: lucem sapientiæ, quæ nō solū huic Ro-
xolaniæ parti, sed vbiq; gentium dux sit honestæ
vitæ, magistra morum, officina virtutum. Ad hanc
regendam, lectissima quæque ingenia, ex Acade-
mia Cracouiensi euocauit, honestissimis stipendiis
collocauit, certis laborum præmiis, prout cuiusq;
vitæ institutum postulat, auctorauit: & perpetua
autoritate iuris firmavit, libertatibus, & immuni-
tatibus, cum à sanctissima sede Apostolica Roma-
na, tum à Serenissimo Rege, atque vniuersa Reipub.
E impetra-

impetratis, non modò muniuit, sed etiam ornauit:
Hippeumque appellauit. Præter enim cæteras A-
cademias, quæ in hoc imperio reperiuntur, hoc Sa-
mosciana habet peculiare, quòd quãta quanta est,
tota sic est conformata, vt equitum, hoc est, nobi-
litis Polonæ institutioni sit accõmodatissima, si-
ue disciplinarum delectu, siue tradendi via, ac rati-
one. Scilicet sapientissimo illi homini, cui omnia
viscera, & medullæ Reipub. nostræ fuerunt notissi-
mæ, non facile veniebat in mentem, quibus arti-
bus iuuentus Polona conformata, utilis Reipub. ef-
ficietur, & quibus non. Vidit, vidit ille, ideo ex
præfinito necessitatis ciuium Polonorum, totam
rationem institutionis statuit, & ordinauit. Habēt
igitur reges, principes, habent primates & proce-
res in Samoscio, non solùm quod admirentur, sed
etiam quod æmulentur, & imitentur. Primatum
est, principum, & regum, vrbes condere: condebat
Samoscius: templa ædificare, ædificauit Samosci-
us: Academias instituere, instituit Samoscius. De-
nique, omnia, quæcunque præclara, & magnifica,
partim perfecit, partim affecit Samoscius. Quæ
laus solidior est in illo, quàm in aliis. In cœlũ lau-
dibus tollitur Franciscus Galliarum Rex: in cœlũ
laudi-

laudibus tollitur Laurētius Medicus Florētiae prin-
ceps, quorum ille in Gallia, hic in Italia, eximia li-
beralitate in viros doctos, ex tenebris in lucem, o-
ptimas literas euocarunt: magnoq; nō solùm fru-
ctu, sed etiam gloria ciues suos auxerunt. Et meri-
tò tolluntur in cœlum laudibus. Quis enim est, aut
esse potest Rex, siue princeps laudatus, nisi hæc duo
genera hominum foueat, promoueat, euehat: for-
tem militem, & doctum virum: alterum foris, al-
terum domi, mirificè necessarium: qui id non fa-
ciat, nec sibi vnquam, nec Reipub. utilis, veræque
laudis expers est futurus. Fecerunt id ergo omnes
laudatissimi Reges, principes: sed tamen Reges, &
principes, partim ex communi, partim ex amplissi-
mis patrimoniis liberales erant: noster Samoscius
nec nomine, nec opibus, sed dignitate Rex, & prin-
ceps: non publicas, sed proprias: non relictas, sed
quæsitæ propria industria opes, largè, & alacriter,
in Reipub. salute collocauit. Considerate quæso,
qui priuatis rebus propter commune bonum non
pepercit, quem eum in publicis fuisse existimatis?
Quæsitus aliquando, quare huius loci, atque ordi-
nis homo, quod plerique omnes faciūt, nullos thy-
melicos & symphonicos haberet, respondit: Aca-

dēmicos Professores suos symphonicos esse: Typographiam verò suā esse musicam. Quæ vox potest esse magnificentior? Scilicet ille magno, & excelso animo vir, nullum acroama dulcius esse, quā sapientiæ declarabat: nullam animi præsentio-rem recreationem, quàm ab honestis artibus, & scientiis sentiebat. Nec eum ratio fefellit. Hæc enim symphonia, non solum has regiones suauissima doctrinarum auditione erudiuit, sed per vniuersum orbē terrarum delata, non modò Samoscii, sed cum eo totius Poloniae nomē, ac gloriam propagauit. Populi enim Poloni laus est, esse in Polonia Academi- as frequentiores: vnde non modò discamus, sed etiam doctissimas regiones doceamus, & literarum monumentis augeamus. Dictitare solebat: si mihi tam diues arca esset, ex qua ciues Polonos omnes ditare possem, ditāsem; nunc quum recta liberorū institutio omni auro est preciosior, huius perennem fontem aperui illis Academiam, vnde eam filii ciuium haurire poterunt. Quæ illustrior, siue ad honestatem, siue ad diurnitatem munificentia? Iudicate, vtrum fingi, cogitari nē aliquis possit, qui facultates suas pulchrius collocare potuerit, quàm Samoscius collocauit. Sed ad illas virtutes
veniam,

veniam, quæ non adeò ex arca, quàm ex animo depromptæ, causam earum sustinent, ex quibus istæ tanquā ingenuæ proles progenerantur. Ex qua enim radice pululasse putatis, tantos pro Repub, pro bono communi, pro hominum salute labores, sollicitudines, curas, vigilias, de ipsa vita dimicationes? Quanquam enim magna est virtutum, laborum, periculorumque merces, magnum præmiū commemoratio nominis, sempiterna laus, & gloria rerum præclare gestarum: cuius ille amorē honestissimum non solum confitebatur, sed etiam consecutus est: nec solum consecutus est, sed etiā orbis terrarum finibus terminauit. Verumtamen non his regionibus vitæ suæ spacium circumscribebat Ioannes Samoscius, non his limitibus cogitationes suas terminabat, maioris gloriæ stimuli animum illius concitabant: parui, & erronei animi esse ducebat, vt is, qui ad extremum spatium nullū tranquillum, atque otiosum spiritum duxerit, per exigui sæculi curriculum, tam leue præmium reportare satis existimauerit. Omnium igitur clarissimarum virtutum caput, & fontem solum, ac fundamentum habuit sanctissimam religionem, ac fidem vnicam Catholicam Romanam. Hanc solam

credebat certissimè, ac verissimè, ostium esse vnicū
ad gloriam immortalem: non hanc, ex testimonio
hominum, licet bonorū, collectam; sed illam Dei
Opt. Max. gratia ac dono collatam. Hac ille, tan-
quam regula, omnes actiones suas metiebatur: hac,
ceu sapimēto, ac vallo, valabat: pro hac perpetuò
contra infidos, contra schismaticos, contra hære-
ticos, dimicabat. Huius extremo testamento vni-
cum filium heredem instituit, hisque verbis est al-
loquutus. *Te, charissime fili, non modò hortor, verū-
etiam obtestor: primū quidem, ut Deum & pieta-
tem ante omnia colas: eamque, non modò potissimum,
sed solum quasi bonum, aut omnium bonorum vnicum
fundamentum iudices: imprimis religionem Catholi-
cam constantissimè tuearis, hæreses, nouaque dogma-
ta, quacunque, quocunque, etiam nomine obtrudantur,
fugias: ac si forte Regni amplissimi ciuem te lateris,
ijs maioribus, qui meritis suis aliquam tibi nominis fa-
mam reliquerint: tantò magis prestantiore parente,
Ecclesia Catholica letandum tibi statuas: quæ non mo-
dò tot Regum, atque principum, sed quod longè præcla-
rius, omnium sanctorum communis mater est: &
in cuius gremio mori felicius est, quàm ab initio na-
sci, cum non nasci satius sit, quàm in hac non mori.*

Hanc

Hanc etenim obtestationē illustrissimis operibus
consignasti. Quod enim illustrius est opus homi-
nis Catholici, quàm integerrima fide, spe fidissima,
charitate ardentissima, obedientia benevolentissi-
ma Catholice Ecclesie, hoc est, Deo ipsi, cum vo-
tis, supplicationibus, precibus, intimè adhærere?
Quod maius opus, quàm iuuandæ patriæ totum se
dare, excitare afflictos, opem ferre egentibus, to-
tum se vsibus hominum tradere? Quod verius o-
pus, quàm ita viuentem, vsque ad extremum vitæ
spiritum, benè agendo non defatigari? verbis o-
pus non est, luce sunt clariora omnibus, hæc om-
nia fuisse in Samoscio: in votis, supplicis, precibus
ad Deum fundendis, noctes, atque dies perseuera-
bat ardentissimus: sacrorum, & rituum, quæ Eccle-
sia Romana probauit, obseruantissimus: in com-
munionem sacramentorum frequentissimus: in o-
peribus pietatis largissimus. Testantur pietatē tem-
pla, altaria, magnifico opere, ac sumptu constructa,
preciosissimis apparatus ornata: testantur ordi-
nes, & collegia sacerdotum dotata: testantur do-
naria in subsidium pauperum, tam literis operas
nauantium, quàm ciuium legata: testantur pto-
cho dochia ædificata, & munerata. Quod si vt fan-
ctissimi

ctissimi homines senserunt, decretisq; publicis sciuerunt, vtile, & necessariū est, esse seminaria, in quibus iuuentus piē, ac sanctē, à ministeriis diuinis futura, instituatur, Academia quoque Samosensis in opere pientissimo illius iustissimè debet memorari. Cuius pietatis, quū non solū auditor, sed etiā spectator esset: nec spectator solū, sed admirator Clemens octauus Pontifex maximus, toties animum hunc eius exosculatus, honorificentissimè scriptis literis laudauit, augustissimaque munera ex sanctuarij sui, imò totiūs cætus Christiani thesauro deprompta, petēti dedit liberaliter: quibus nūc noua templa, nouis gratiē diuinæ muneribus quasi animata, salutariū à cætu Christiano frequentātur, & celebrantur. O diuinam herois nostri pietatem, auditores, qui loca paullò ante horrida, & inculta, ferarum latibula, non solū frequentia hominum, sed, quod maius est, diuini cultus studiis, fecit esse celeberrima. Præsciuerat hunc, & prædestinauerat Deus Opt. Max. talem futurum: idcirco tanta illum felicitate beauit, quā omnes nostrorū Imperatorum, omnes exterarum gentium, potentissimorumque populorum, omnes clarissimorum Regum res gestas superauit. Magnas res gessit Cy-

rus Perfarum imperii conditor, Asiæ & totiūs orientis domitor: sed infelix demum, quū in fœmineas insidias præcipitatus, exercitum & vitam simul perdidit: nulla talis in nostro offensio, semper victor, nunquam victus, vsque ad extremum vitæ spiritum perdurauit. Magnas res gessit magnus Alexander Macedo, imperii Græci auctor, Persici euerfor: sed infelix: primum fortuna, deinde vino ebrius: commessator, amicorum charissimorum interfecto, peregrè suorum insidiis obiit. Nostrū heroē, nec aduersa fortuna vnquā fregit, nec prospera inflauit: plus semper genio negabat, quā indulgebat, imò quā necessitati satisfaciebat: amicorum obseruantissimus, ab inimicis cautissimus. Potentissimus fuit populus Romanus virtutibus bellicis Scipionum, Syllæ, Pompeii, Iulij Cæsaris: virtutibus vrbanis, Ciceronis, Catonis. Sed Samoscius felicior Scipionibus: quorū maior Linterni exulauit, maior à suis in cubiculo est interfectus: felicior quā Sylla, qui respersus sanguine suorum ciuium, crudelitati finem posuit, inopiam cædendorum: felicior Pompeio, qui ciuili bello victus, eunucho imbelli iugulum præbuit: felicior Iulio Cæsare: qui oppressor libertatis, euerfor le-

gum, tyrannus patriæ, ciuili ferro atrocissima morte obiit: felicior Cicerone, qui nullus prope in rebus bellicis, primum exul, deinde proscriptus, subiecit caput ferro interfectoris. Duabus tamen rebus similis: vna, quod ambo fuerunt doctissimi & eloquentissimi: altera, quod ambo libera Repub. Patres patriæ sunt appellati. Magnus autem Samoscius, rebus gestis æqualis Scipionibus, Syllæ, Pompeio, Iulio Cæsari, doctrina & eloquētia Cicero- ni, & felicitate omnibus his superior: nunquā sanguinem ciuilem vidit: incolumem patriæ libertatem conseruauit: illud in se conuertit, quod de illo Censorio Catone proditum erat: fuit optimus ciuis & Senator, optimus Orator, optimus Imperator. Catonis tamen virtus, flamma inuidiæ adusta, conflagrauit: Ioannes Samoscius, omnem inuidiam virtute superauit. Iam fracta valetudine ex Liuonico bello rediit: neque tamen hæc eum à salute Reip. est remorata. Causa Comitiorum Warschauiam iuit, sed quacunq̄ue iuit, omnis populus certatim effundebatur gratulabundus, conseruato- rem, patronum Poloniæ, Patrem patriæ salutando: tensis palmis in cælum, vota & supplicia pro salute illius suscipiendo. Cui vnquam post Polo-
niæ

niæ memoriā, talis triumphus contigit? Cantabatur cum plausu Cæsaribus Romanis ille versiculus: *De nostris annis tibi Iuppiter augeat annos.* Sed iam non libera Repub. seruorum & adulatorū seruitus & adulatio, illas non veras, sed fictas voces extorquebat. Ioannes Samoscius in Repub. liberima, à liberrimis hominibus, Pater patriæ est appellatus: supra omnē inuidiā caput extulit. Imò ex ipsa inuidia clarissimum triumphum egit: omnium triumphorum decus. Rediit à Comitiiis domū, debilissimo corpore, sed animo vegetissimo: sensit se ex huius vitæ statione euocari: ab illo summo omnium Imperatore: sacris Christianis se arnauit: & iam funeris sui cantator ipse, tumulo suo, hæc verba concepit, & inscribi iussit: *Ioannes Samoscius, quicquid mortale habuit, hic deponi iussit.* Magno ac inuictō, vt semper fuit, animo, inter sermones, de æterna illa beatitudine, de præmiis bonorum, obdormiuit. O lux Poloniæ extincta es: o turris fortissima fracta es. Dum viuebat, duo hæc optabat: vnum, vt patriam liberam relinqueret: alterum, vt filium decurso artium optimarum curriculo, excultum & eruditum conspiceret. Nam hæc etiam optatissima parentibus felicitate cumu-
latus

Iatus est, Thoma Samoscio : qui susceptus ex illustissima & lectissima coniuge Barbara, Comite à Tarnow, nō solum ore patrem refert, sed etiam indole & ingenio : mirifica memoriæ capacitate, discendi celeritate, intelligendi acumine : vt illi pater nō solum patrimoniū, sed etiam gloriam hereditate reliquisset videatur. Vtrumq; igitur consecutus est. Exantlatis enim sexaginta trium annorum laboribus, decursis honoribus, domitis hostibus, pacatis finibus, in libera Repub. mortuus est : alterum reliquit iis continuandum, quorum curæ domum suam vniuersam commendauit: Georgio Samoyski, Episcopo Chelmensi, Abbati Ceruenecen. cognato & dilecto suo : Nicolao Zebrzydowski Palatino Cracouien. ac Generali, affini suo: Marco Sobieski Palatino Lublino. Stanislao Zolkiewski, Castellano Leopoliensi. ac Præfecto Campestri exercituum Regni Poloniæ, laborum suorum in bellis altero Thæseo. Hi sapientia, virtute, honoribus, ac rebus gestis, magni & illustres viri, cum præceptoribus, quibus ille dum viuebat institutionem in literis bonis filii sui mandarat, nihil antiquius habent, quā vt ex præscripto parentis, & desiderio, educetur, instituat, erudiatur : & qui nunc sunt


in æta-


in ætate tenellula, annorum duodecim, profectus illius in studiis humanitatis, ex his non dubium argumentum sumitur, fore vt existat dignus & patria & parente filius. Quum igitur ita habet, quod non solum sapientissimi homines putauerunt, sed etiā sanctissima religio Christiana confirmat : qui patriam conseruauerint, adiuuerint, auxerint, certum esse in cœlo, ac definitum locū: vbi beati æuo sempiterno fruatur. Ioannes Samoscius, qui omnibus dum vixit, à Deo Opt. Max. muneratus fuit: patriam non solum iuuit, conseruauit, auxit: sed vitam & spiritum pro salute illius effudit: in piis operibus facultates & vitam consumpsit: in hoc curriculum vsq; ad finem perseuerauit: potestne cuipiā dubium esse, quin postquam mortuus est, cœlo receptus, æuo sempiterno fruatur? Fruitur verò, & quod in viuis faciebat, orat obsecratq; pro patria. Te verò, ô Rex Sigismunde, ô patria, ô ciues, supernè alloquitur. Ego iam à uobis nulla præmia virtutis, nulla insignia honoris, nulla monumenta laudis postulo: memoriam laborum meorum & meritum postulo: in me exemplum statuetis, qua conditione posthac eos esse velitis, qui se pro salute vestra obtulerint, laboribus, periculisque omni-

F iij

bus,

bus: ne mentes, ne fraudes, ne tela importunissimorum hostium vobis nocere possint, ego prouidi: ne ipsimet vobis, ac mihi noceatis, vestrum est prouidere. quāquam mihi nihil iam noceri potest: quid enim est, quod mihi iam ad vitæ fructū possit acquiri? Sed vestri fructus sunt, vestra laus, in vobis perpetuum præsidium esse, iis, qui dum vixerunt, perpetuum præsidium vobis fuerūt: hoc bonitas animi, hoc gratitudo, mater virtutum omnium postulat. Hæc ille à patria. A te verò generosissime puer, non iā lachrymas, sed vt memineris, quo & quali parente natus sis: quibus maioribus: vt Patronos tuos ames, colas, obserues, studia literarū tractes, Academiam hanc paternam, altricem iuventutis tuæ, ames, tuearis, augeas: vt dignus tanto parente filius inueniaris. Dixi.





Hist. Polon.
C. Mifcell.

